


Gerencia di Red Sox no a gusta cu Xander Bogaerts a bira agente liber

Lo haci lo maximo pa trece bek pero a ofrece solamente 19 miyon



Boston Red Sox ta muestra determina pa firma Xander Bogaerts bek pa e ekipo, despues cu e pelotero Arubiano, a haci uzo di un opcion den su contract, pa declara cu mes agente liber y busca un oferta miho cu loke e tin na e momentonan aki.

Chaim Bloom, kende ta Chief Baseball Officer di Red Sox a declara na prensa cu “nos no ta contento cu loke el a haci y bira agente liber.”

El a sigui muestra cu e ta un tiki decepcionante pa gerencia cu Xander a dicidi di converti den un agente liber, ya cu semper di su carrera den baseball organisa na Merca, el a hunga pa solamente Boston Red Sox.

“Nos kier pa e keda aki, nos kier pa e sigui haci su carrera aki y cu ta desde cu e tin 16 aña, el a hunga pa nos organizacion.

Sin duda e ta haci nos un miho ekipo, nos no ta den shock pa e decision cu el a tuma ya cu ta algo cu nos a spera cu e lo haci, ya cu agencia liber ta parti principal di wega di baseball y ta algo grandi pa hungadonan.”

Bloom a sigui muestra cu desde cu Bogaerts a firma su ultimo contract, e no a haci uzo di e opcion aki pero na mes momento el a sigui mantene e derecho aki y ta conoci cu hungadonan di e dos liganan, ta mira e opcion aki como algo esencial pa nan sigui dilanti.

“Nos ta respeta su derecho di haci uzo di e clausula aki riba e mercado di agente liber pero nos kier e bek y nos lo sigui negocia cu ne pa e bin bek.

Xander ta nos prome escogencia y esey ta algo cu lo no cambia pero ta parti di nos trabou tambe como gerencia, di percura cu pa proximo temporada, Red Sox lo ta competitivo atrobe y nos tin cu busca tur posibilidad existente pa logra esaki pero Bogaerts ta keda nos prome prioridad sin duda,” Bloom a declara.

OFERTA

Diahuebs ultimo, gerencia di e ekipo a ofrece tanto na Xander como e pitcher estelar Nathan Ovaldi, un oferta cu ta conoci como “qualifying offer” loke ta permiti e ekipo den futuro, ricibi un compensacion di draft si un di e dos hungadonan aki firma c’un otro ekipo cu no ta Boston.

Ta trata di un oferta di \$19.65 miyon y pa mañan diamars 15 di November, e dos hungadonan tin cu acepta of nenga e oferta aki, loke ta casi sigur cu tur dos hungado lo nenga e oferta aki. Den caso di Bogaerts ta ser muestra cu ta imposibel pa e shortstop Arubiano, acepta e oferta aki mirando cu e contract cu el a caba di bandona, ta hopi mas halto cu loke e “qualifying offer” ta. Sr Bloom na varios ocasion a ripiti na prensa cu meta principal na e momentonan aki, ta pa yega na un comprendemento cu e hungado di Aruba, ya cu e ta e prioridad number uno di e ekipo pa proximo temporada.

Diahuebs siman pasa tambe Xander a gana di cinco trofeo “Silver Slugger” di Liga Americana como e miho short stop ofensivo caminda su averahe di .307, su porcentahe di subi base di .377, tabata e miho di tur shortstop di Liga Americana.